



## KENYATAAN MEDIA

KEMENTERIAN EKONOMI  
JABATAN PERANGKAAAN MALAYSIA

Blok C6 & C7, Kompleks C,  
Pusat Pentadbiran Kerajaan Persekutuan, Presint 1,  
62514, Wilayah Persekutuan Putrajaya  
No. Telefon : 03 - 8090 4681

### PERANGKAAAN SEBAB KEMATIAN, MALAYSIA, 2024

#### ***PNEUMONIA* MERUPAKAN SEBAB KEMATIAN UTAMA DI MALAYSIA DENGAN 18,181 KEMATIAN**

**PUTRAJAYA, 29 OKTOBER 2024** – Jabatan Perangkaan Malaysia telah mengeluarkan laporan Perangkaan Sebab Kematian, Malaysia, 2024 yang membentangkan statistik sebab kematian di Malaysia bagi tahun 2023 mengikut ciri-ciri demografi di peringkat nasional, negeri dan daerah pentadbiran. Statistik ini merupakan input penting bagi penggubalan polisi dan perancangan program berkaitan bidang kesihatan serta sumber rujukan kepada penyelidik dan akademik. Punca kematian dalam kalangan penduduk Malaysia adalah penting diketahui untuk menggalakkan penduduk memperbaiki gaya hidup pada masa hadapan, menilai keberkesanan sistem kesihatan Malaysia serta peruntukan sumber secara langsung ke kawasan dan golongan sasaran.

Mengulas terhadap laporan tersebut, Dato' Sri Dr. Mohd Uzir Mahidin, Ketua Perangkawan Malaysia berkata, “Sebanyak 196,965 kematian direkodkan pada 2023 yang mana 119,652 (60.7%) adalah sebab kematian yang disahkan secara perubatan dan 77,313 (39.3%) adalah sebab kematian yang tidak disahkan secara perubatan. *Pneumonia* merupakan sebab kematian utama di Malaysia pada 2023 dengan 18,181 kematian atau 15.2 peratus daripada jumlah kematian yang disahkan secara perubatan. *Pneumonia* mengatasi *Ischaemic heart diseases* sebagai sebab kematian utama buat kali pertama dalam dua dekad, kecuali pada 2021 iaitu *COVID-19 infection* (*due to*) merupakan sebab kematian utama. Sebanyak 12,648 (17.6%) kematian disebabkan oleh *Ischaemic heart diseases* adalah dalam kalangan lelaki, manakala sebab kematian utama bagi perempuan adalah *Pneumonia* iaitu 7,815 (16.4%).

*Pneumonia* merupakan sebab kematian utama bagi etnik Cina dan Bumiputera Lain yang masing-masing merekodkan 4,887 kematian (16.4%) dan 1,255 kematian (12.2%) pada 2023. Sementara itu, etnik Melayu dan etnik India masing-masing merekodkan *Ischaemic heart diseases* sebagai sebab kematian utama iaitu 16.0 peratus dan 20.6 peratus”.

Selain daripada sebab kematian utama yang biasa berlaku di Malaysia iaitu *Pneumonia*, *Ischaemic heart diseases*, *Cerebrovascular diseases* dan *Transport accidents*, terdapat juga keunikan sebab kematian mengikut etnik dalam kedudukan 10 sebab kematian utama seperti *Diabetes mellitus* yang lebih sinonim dengan kematian bagi etnik Melayu dan India manakala *Cancer* adalah sebab kematian dalam kalangan etnik Cina.

Ketua Perangkawan berkata, peningkatan kematian disebabkan *Pneumonia* adalah disumbangkan oleh kesan pasca pandemik di mana jangkitan paru-paru dalam komuniti menyebabkan *Pneumonia* terutama bagi individu yang mempunyai sistem imun yang lemah dan masalah kesihatan sedia ada. Sementara itu, *Ischaemic heart diseases* yang merupakan sebab kematian kedua tertinggi di Malaysia pada 2023 adalah disebabkan amalan gaya hidup dan pengambilan pemakanan yang tidak sihat. Ini disokong oleh kenyataan dari Kementerian Kesihatan Malaysia iaitu *Ischaemic heart diseases* berlaku apabila saluran darah menjadi keras dan sempit disebabkan oleh plak kolesterol. Faktor risiko utama penyebab penyakit ini adalah termasuk merokok, paras kolesterol yang tinggi, tekanan darah tinggi, diabetes dan faktor usia. Selain itu, terdapat juga faktor lain yang mempengaruhi seperti obesiti, kurang menjalankan aktiviti fizikal dan sejarah keluarga. Selain *Ischaemic heart diseases*, beberapa penyakit tidak berjangkit lain seperti *Cerebrovascular diseases*, *Hypertensive diseases* dan *Diabetes mellitus* turut disebabkan oleh amalan gaya hidup dan pemakanan yang tidak sihat.

Ketua Perangkawan turut berkata, sebab kematian utama bagi penduduk berumur 60 tahun dan lebih adalah *Pneumonia* yang merekodkan 14,377 kematian atau 19.3 peratus, manakala penduduk berumur 41-59 tahun merekodkan *Ischaemic heart diseases* pada 19.8 peratus (5,673 kematian). Selain itu, *Transport accidents*

merupakan sebab kematian utama bagi penduduk berumur 0-14 tahun dan 15-40 tahun yang masing-masing merekodkan 3.7 peratus dan 20.1 peratus.

Selain itu, *Ischaemic heart diseases* mencatatkan sebab kematian kedua tertinggi di Malaysia dengan 15.1 peratus diikuti *Cerebrovascular diseases* (7.2%) dan *Transport accidents* (3.5%). Selain daripada sebab kematian utama tersebut, statistik menunjukkan bahawa kematian yang disebabkan oleh *Cancer* turut meningkat sejak tahun 2001 daripada 5,231 kematian kepada 16,545 kematian pada 2023. *Cancer of digestive organs* merekodkan yang kematian tertinggi berbanding kanser lain iaitu 5,054 kematian, diikuti oleh *Cancer of respiratory and intrathoracic organs* (2,530 kematian) dan *Cancer of breast* (1,681 kematian).

Mengulas lanjut, enam negeri di Malaysia iaitu Pahang, Perlis, Pulau Pinang, Sabah, Sarawak dan W.P. Labuan merekodkan *Pneumonia* sebagai sebab kematian utama, manakala 10 negeri lain merekodkan *Ischaemic heart diseases* sebagai sebab kematian utama. Perlis merekodkan peratusan tertinggi bagi *Pneumonia* iaitu 18.6 peratus diikuti oleh Pulau Pinang (17.8%) dan Sabah (14.2%).

Laporan ini turut membentangkan sebab kematian utama di peringkat daerah pentadbiran di Malaysia. *Pneumonia* juga merupakan sebab kematian utama di 78 daerah pentadbiran dan peratusan tertinggi direkodkan di daerah Kubang Pasu, Kedah dengan 26.3 peratus. Sementara itu, *Ischaemic heart diseases* merupakan sebab kematian utama di 65 daerah pentadbiran dengan peratusan tertinggi dicatatkan oleh Langkawi, Kedah (31.3%). Selain itu, 11 daerah merekodkan *Cerebrovascular diseases* sebagai sebab kematian utama, manakala *Malignant neoplasm of breast* direkodkan di satu daerah (Kalabakan, Sabah) dan *Hypertensive diseases* di satu daerah (Dalat, Sarawak).

Buat pertama kali, laporan ini membentangkan analisis berkenaan kematian disebabkan oleh *Intentional self-harm* (bunuh diri) berdasarkan laporan daripada Polis Diraja Malaysia. Pada 2023, bilangan kematian bunuh diri di Malaysia meningkat daripada 641 (2020) kepada 1,068 kematian. Sementara itu, kadar kematian bunuh diri meningkat daripada 2.0 pada 2020 kepada 3.2 kematian bagi setiap 100,000 penduduk pada 2023. Selangor merekodkan kematian tertinggi iaitu 305 kematian,

**Embargo:** Hanya boleh diterbitkan atau disebarkan pada jam 1200, Selasa, 29 Oktober 2024


diikuti oleh W.P. Kuala Lumpur (135 kematian), Johor dan Pulau Pinang (123 kematian).

Ketua Perangkawan berkata, di kalangan negara terpilih, *Ischaemic heart diseases* merupakan sebab kematian utama bagi *United States of America* dan *Australia* pada 2022. Sementara itu, *Republic of Korea*, *Japan*, *Canada* dan *Singapore* merekodkan *Cancer* sebagai sebab kematian utama pada tahun yang sama. *United Kingdom* menunjukkan trend yang berbeza iaitu merekodkan *Dementia and Alzheimer diseases* sebagai sebab kematian utama pada 2022.


Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Kerajaan Malaysia telah mengisytiharkan Hari Statistik Negara (MyStats Day) pada 20 Oktober. Tema sambutan MyStats Day adalah “Statistik Nadi Kehidupan”. DOSM menyambut ulang tahun ke-75 Jubli Intan pada tahun 2024.


**Carta 1: Kematian dan kadar kematian kasar, Malaysia, 2011-2023**




**Carta 2: Sebab kematian utama, Malaysia, 2000-2023**




**Carta 3: Tiga sebab kematian utama tertinggi mengikut kumpulan umur terpilih, Malaysia, 2023**



**Carta 4: Tiga sebab kematian utama tertinggi mengikut etnik utama, Malaysia, 2023**



**Carta 5: Bilangan dan kadar kematian bunuh diri, Malaysia, 2020 hingga 2023**



**Jadual 1: Sebab kematian utama bagi negara terpilih, 2021-2022**

| Negara                   | 2021                     | 2022                            |
|--------------------------|--------------------------|---------------------------------|
| United States of America | Ischaemic heart diseases | Ischaemic heart diseases        |
| Republic of Korea        | Cancer                   | Cancer                          |
| Japan                    | Cancer                   | Cancer                          |
| United Kingdom           | COVID-19                 | Dementia and Alzheimer diseases |
| Canada                   | Cancer                   | Cancer                          |
| Australia                | Ischaemic heart diseases | Ischaemic heart diseases        |
| Singapore                | Cancer                   | Cancer                          |

Sumber: Pejabat Statistik Negara dan Kementerian Kesihatan Negara terpilih

Dikeluarkan oleh:

**PEJABAT KETUA PERANGKAWAN  
JABATAN PERANGKAAN MALAYSIA  
29 OKTOBER 2024**